



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu Imprensa
Parlamentu Nasionál

11 Juñu 2014

JSMP konsidera Rezultadu Eleisaun Kandidatu Komisáriu CAC
Legál no Válidu tuir Lei

JSMP konsidera rezultadu eleisaun ba kandidatura Komisáriu Komisaun Anti-Korrupsaun (CAC) iha 10 Juñu 2014 iha Parlamentu Nasionál (PN) ne'e legál no válidu tuir lei. JSMP hanoin katak PN falla atu halo interpretasaun ne'ebé loos ba Artigu 7.1 hosi Lei Nú.8/2009 kona-ba CAC.

Iha eleisaun ne'e, resulta kandidatu Dr. Sergio Hornai manan ho votus 32, no Dr. Silveiro Pinto Baptista hetan votu 14 no votu *nulu* 6. Prosesu eleisaun liuhosi votu sekretu ne'ebé hala'o hosi membru deputadu na'in 52 ne'ebé marka prezensa.

Tuir Prezidente PN, Sr. Vicente Guterres da Silva, rezultadu eleisaun ba kandidatu Komisáriu CAC inválidu. Prezidente PN foti desizaun ne'e tanbá konsidera kandidatu Sergio Hornai manan de'it ho maioria simples ho votu 32 ne'ebé la prienxe maioria absoluta ho votu 33 ka votu $\frac{3}{4}$ tuir artigu 7.1 hosi Lei Nú.8/2009 kona-ba kriaun CAC.

“ JSMP rekomenda ba PN atu haree fila fali Artigu 7.1 husi Lei Nú. 8/2009. Tuir artigu refere, kandidatu eleitu Sergio Hornai prienxe ona kritériu legál atu sai Komisáriu CAC, tanbá nia hetan votu maioria absoluta husi deputadu sira ne'ebé marka prezensa, dehan Diretór Ezekutivu, Luis de Oliveira Sampaio.

Tuir JSMP nian hanoin, votu maioria absoluta tuir lei ne'e, refere de'it ba deputadu sira ne'ebé marka prezensa la'ós ba total deputadu ativu sira na'in 65. Tuir lei ne'e mós eleisaun ne'e só bele hala'o bainhira mínimu liu iha deputadu $\frac{3}{4}$ (48) hosi deputadu ativu sira (65) marka prezensa. Iha sesaun plenaria ne'e, iha deputadu 52

mak marka prezensa no partisipa iha votasaun. Ne'e duni, tuir JSMP nian hanoin, votu maioria absoluta (50+1) hosi deputadu 52 ne'ebé marka prezensa iha eleisaun ne'e mak votu 27 ba leten.

Nune'e, JSMP hanoin katak, PN la presiza ona halo eleisaun foun ho kandidatu ne'ebé hanesan ka foun, tanba rezultadu eleisaun ne'e legál no tuir ona lei.

JSMP mós rekomenda ba Meja PN atu konsidera pareser hosi Bloku Koligasaun Maioria Parlamentar liuhosi presidente bankada PD, CNRT nomós Frente Mudansa ne'ebé kuaze fó pareser ne'ebé hanesan katak presiza ajusta didiak prosedimentu ba eleisaun Komisáriu CAC nian ho lei ne'ebé eziste antes hola desizaun.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp